

■ TWako hegazkinaren bi kutxa beltzak aurkitu dituzte

HERENEGUN gauean aurkitu zituzten itsasoan, duela aste-bete New Yorkeko kostaren gainean lehertu zen TWA konpainiako Boeing 747 hegazkinaren bi kutxa beltzak. 230 lagun hil ziren hegazkin-leherketaren arrazoia argitze-ko oso baliagarri izan litezke kutxa beltz horiek, izan ere, leherketa motoreen akats batek eragin zuen edo atentatu baten ondorio izan zen ez baitakite oraindik EEBetako ikertzaileek. X

TXETXENIA

■ Eskala handiko ekintza militarrek amaitutzat jo ditu Lebedek

ALEKSANDR LEBED Errusiako Segurtasunerako Kontseiluko idazkariak atzo adierazi zuenez, Errusiako Armadak Txetxenian egin dituen eskala handiko ekintza militarrek amaitu egin dira. Lebedek esan zuen aurrerantzean «talde armatuak isolatzea eta txikitzea» talde berezien zeregina izango dela eta Txetxeniako zibilen segurtasuna erabat zainduko dutela. X

TXIN A

■ 1.200 lagunetik gora hil dira azken egunetako uholdeetan

TXINAKO lurraldearen heren batean joan zen ekainetik izan diren uholdeetan 1.200 lagunetik gora hil dira, atzo iturri ofizialek eman zituzten datuen arabera. Datu hauek uholdeak izan diren 11 probintzietatik hirurenak baino ez dira, eta horregatik, biktimak kopurua askoz handiagoa izango dela beldur dira agintariak. X

IPAR IRLANDA

■ Aprehendizen ordenak ez du bertan behera utziko abuztuko martxa

IPAR IRLANDAKO protestanteen Aprehendizen ordenak atzo iragarri zuen ez duela abuztuan Derry hirian iragarrita duten martxa suspendituko, nahiz eta komunitate katolikoa kontra egon. Duela bi aste Ipar Irlandan izandako istiluak errepika litezke, ordena horren martxak Derryko katolikoen Bogside auzoa zeharkatzeko asmoa baitauka. Poliziak ez du oraindik esan martxa horri baimena emango dion edo galaraziko duen. X

JUSTIZIA MINISTROAK LEHENGO LORPENAK KENTZEKO MEHATXUA EGIN DIE GOSE GREBALARIEI

Zazpi preso politiko turkiar hil dira gose grebaren ondorioz

Atzo beste lau preso politiko hil ziren 67 egun gose greban egon ondoren, eta Turkiako presondegiatako krisiak gora egin du, beste preso batzuk hilzorian baitaude. Gobernua presio handia jasaten ari den arren, ez dirudi gose grebalariekin negoziatzeko prest dagoenik.

Agentziak / Ankara

LAU PRESO POLITIKO GEHIAGO hil ziren atzo Turkiako presondegiatan egiten ari diren gose grebaren ondorioz. Huseyin Denircioglu, martxoetik kartzelan zegoena Alderdi Komunista Marxista-Leninistako kide izateaz akusatuta, atzo goizean hil zen Ankaran. Minutu gutxi geroago, Ali Ayata, Alderdi Komunista Turkiar Marxista-Leninistako kide izateaz akusatua, hil zen Bursan, Askatasuna eta Elkartasuna Alderdiko iturrien arabera. Mjdat Yanat Herriaren Askapenerako Fronteko eta Alderdi Iraultzaileko kidea da atzo hil zen hirugarrena eta laugarrena alderdi bereko Irolo Zbolat izeneko. Hildako zazpi preso politiko turkiarren taldea osatzen duten beste hiru preso politikoak aurreko bost egunetan hil ziren Istanbulgo kartzelan, bi Baymparasako espetxean eta bat Umraniye presondegian.

Ilginc Ozkeskin sendagilea, Askapen Popularreko Fronte Nazionalako kidea, asteazkenean hil zen Bayrampasan, 66 egun gose greban egin eta gero. Espetxe horretan bertan hil zen Altan Berdan Kerimgiller asteartean. Gose grebaren lehen biktimak Aydin Ugur, 25 urtekoa, izan zen, joan zen astelehenean hil zena.

«Uneoro beste hildako baten zain gaude. Oso zaila da bizirik irautea 67 egun gose greban egon eta gero», azaldu zuten atzo Askatasuna eta Elkartasuna Alderdiko iturriek. Alderdi horren egoitzan, presoek gurasoak ere gose greba egiten ari dira.

Preso politikoek bizi-baldintza hobeak eskatzen dituzten pre-



Altan Berdan Kerimgiller preso politikoa, gose grebaren ondorioz hil zen bigarrena.

HURRIYET / REUTER

sondegietan, tratatu txarrak amaitzea, prozesatzen dituzten lekutik urrun ez bidaltzea eta Eskisehir espetxea ixtea.

Sevket Kazan Turkiako Justizia ministroak joan zen asteazkenean adierazi zuen «zenbait preso terroristak» euren esku zituztela gose grebalariek eta euren liderrak preso batzuk presionatzen ari direla gose greba azken muturreraino eramanez. Kazanek azaldu zuen ekintza horrek ez duela emaitzarik izango eta ohartarazi zuen, preso politikoek jarrera horri eutsiz gero, aurretik emandako eskubide batzuk kenduko dizkietela. Er-

zurum hiriko espetxean, bi gose grebalaria euren buruari su ematen saiatu ziren, baina kartzelako funtzionarioek galarazi egin zieten.

Tentsio handia kaleetan • Azken heriotzek Turkiako kale nagusietako tentsioa areagotu dute. Asteazkenean manifestaldi ugari egin ziren eta gauean, berriaz, ezkerreko mugimenduko militante batzuk borrokan aritu ziren poliziekin. Jende talde bat, gehienak hil arterainoko gose greban ari diren 216 preso politikoren senideak, Justizia Ministerioaren aurrean manifestatu zen.

Poliziak Istanbulgo auzo batzuetan eskuhartu zuen eta hamasei lagun atxilotu zituen. Atxilotutakoak Kurtulus albizkari ezkertiarreko bulegoetan zeuden. Kocaeli probintziako Gebze hirian, pertsona batek poliziei tiro egin zien eta agente bat hil eta beste bat zauritu zuen.

Necmettin Erbakan islamistaren gobernua asteazkenean bildu zen krisi hau aztertzeke, eta bileraren ostean, atzo goizaldera, Namik Kemal Zeybek bozeramaileak adierazi zuen Justizia ministroak Turkiako kartzelako gose grebalariekin inguruko txostena aurkeztu zuela. X

Ntibantunganya presidenteak iragarri bezala Burundiko Armadak estatu kolpea jo eta Buyoya eraman du boterera

■ Parlamentua indargabetu eta alderdi politikoak galarazi egin dituzte lehendakari ohiaren aldekoek

Agentziak / Brusela-Nairobi

BURUNDIKO lehendakariak, Sylvestre Ntibantunganya hutuak, azken egunotan karguan jarraitzeke prest zegoela adierazi arren, kolpea jo duten militarrek irrati estatalean zabalduko agiriaren baieztatze egin dute atzora arteko lehendakariaren beldurra, hau da, militarrek eta zenbait zibil estatu kolpea prestatzen ari zirela. Belgikako telebistari eginiko adierazpenetan Ntibantunganya lehendakariak «karguan nago, eta ez naute botako negoziatu gabe», adierazi zuen. Estatu kolpearen ondorioz,

ordea, 1989-1993 aldian presidente izan zen Buyoya izango da Burundiko presidente berria.

Adierazpenok egin baino egun bat lehenago babes politikoa eskatu zuen Burundiko lehendakari kendu berriak Estatu Batuen enbaxadan, baina estatu kolpea gelditzeko egindako adierazpenek eta lan guztiek porrot egin zuten atzo. Tebistako adierazpenotan gogor kritikatu zuen artean Burundiko presidente zen Ntibantunganyak gutxiengo tutsiaren Uprona alderdia (Aurrerapen Nazionalerako Batasuna) bere Frodepu alderdiarekin osatzen zuen Gobernu

koalizioa hausteagatik.

Estatu kolpea jo duten militarrek Bujumbura hiriburuko eraikin nagusiak eta irrati-telebista estatala dauzkate kontrolpean, irrati nazionalen Defentsa Ministerioak zabaldu zuen agiri ofizialak jakinarazi zuenez. Militarrek Pierre Buyoya aurreko presidentea eraman dute boterera eta hartutako lehen erabakiaren arabera Parlamentua indargabetu eta alderdi politikoak desegin egin dituzte. Horretaz gain, mugak itxi egin dituzte eta greba eta jende bilkurak galarazi.

Kolpearen ondorengo presidentek, Pierre Buyoya, tutsi et-

niakoa eta Burundiko Armadako komandantea, 1987an emandako estu kolpeko buruzagia izan zen. Ndadayeren esku utzi behar izan zuen estatu agintaritzan 1993an, azken honek irabazi baitzituen Burundiko lehen hauteskunde demokratikoak.

Militarrak estatu kolpea prestatzen ari ziren zurrumurruak zabaldu ziren aste honetan Bujumburan, etnien arteko azken hilketen ondorioz oso egoera larrian baitzegoen Ntibantunganya presidentea. Hiriburuko iturri diplomatikoek adierazi dutenez militarrek eta poliziak kaleak hartuta dauzkate. X